

Perkembangan al-Jam‘iyah al-Waṣāliyah di Indonesia

Selain daripada al-Jam‘iyah al-Muhammadiyah dan lain-lain perhimpunan Islam yang sangat-sangat berjasa dalam mengembangkan Islam di Indonesia maka al-Jami‘yah al-Waṣāliyah yang kami hidangkan perjalanannya di sini ialah sebuah pertubuhan Islam yang sangat besar khidmatnya dalam lapangan Islam dan kebajikan masyarakat Indonesia sepanjang masa lebih daripada suku kurun semenjak ia ditubuhkan di Medan Deli – P.Q

oleh: Yusuf Ahmad Lubis

Pengurus besar al-Jam‘iyah al-Waṣāliyah (seberang di Malaya)

al-Jam‘iyah al-Waṣāliyah ialah satu perhimpunan yang berasas Islam, bertujuan melaksanakan tuntutan agama Islam dan kebahagiaan hidup dunia dan akhirat.

Amal dan Usahanya

Majlis Tabligh dan Penerangan.

Majlis ini menitikberatkan usahanya di dalam menyampaikan pelajaran-pelajaran agama Islam dengan mengadakan syarahan-syarahan agama di segenap tempat, baik di bandar, kampung atau dusun.

Majlis ini berusaha mengadakan syiar-syiar Islam terutama pada hari-hari besar Islam, seperti Eidul Adha, Eidul Fitri, Maulid Nabi dan mikrajnya, dan sebagainya. Dan juga berusaha melatih pemuda-pemuda dan pelajar-pelajarnya dalam cara bersyarah dan mengadakan pelajaran yang khas untuk pensyarah-pensyarah.

Penerangan agama yang dilakukan oleh al-Jam‘iyah al-Waṣāliyah mendapat kunjungan ramai dimana-mana tempat. Hingga hari ini lapangan syarahan dan tabligh adalah mengambil tempat tersendiri dalam menempuh majunya al-Jam‘iyah al-Waṣāliyah.

Dengan ini kelak akan timbulah Ikhwah Islāmiyah dan masyarakat marhamah yang sebenarnya dalam kalangan umat

Islam sebagaimana yang dicita-citakan.

Majlis Amal dan Sosial

Majlis ini ialah bahagian pemeliharaan fakir miskin dan yatim piatu. Berusaha menampung anak-anak yatim dan miskin dengan membelanjai keperluan hidupnya, memberikan pelajaran dan pendidikan agama dan pengetahuan umum.

Majlis ini di bawah pimpinan saudara Mohammad Nordin.

Pada masa ini tempat anak yatim itu ialah di Pulau Berian Medan, Jalan Ismailiyah Edan, Sunggal Kampung Lalang dan Lubuk Fakam (Serdang).

Jumlah anak-anak yatim dan fakir miskin yang dirawat di semua tempat itu ialah berjumlah 612 orang (527 lelaki dan 85 perempuan), di antaranya ada beberapa orang yang buta.

Perbelanjaan yang mesti dikeluarkan pada tiap-tiap setahun lebih kurang 1,961,385 rupiah.

Rancangan pembangunan dalam hal ini untuk tahun yang akan datang adalah ditaksirkan kira-kira sejuta rupiah.

Antara lain-lain membuka perkebunan kecil, pertukangan kayu dan besi, jahit-menjahit untuk wanita dan pertukangan sepatu untuk lelaki.

Majlis Pengajaran dan Pendidikan

al-Jam‘iyah al-Waṣāliyah mempunyai bentuk-bentuk perguruan:

- (1) Tajhīzī lamanya 2 tahun, (2) ‘ibtida’ī 4

tahun, (3) Thanawī 3 tahun, (4) al-Qism al- ‘Ālī 2 tahun, dan (5) Takhaṣuṣ 2 tahun. Kelima-lima tingkatan perguruan ini mengutamakan pelajaran umum.

Selain daripada itu peraturan dalam sekolah-sekolahnya bilangan ialah: (6) Sekolah Rakyat 6 tahun, (7) Sekolah Menengah Pertama – 3 tahun, (8) Sekolah Menengah Atas- 3 tahun, (9) S.G.B (Sekolah Guru- P.) 4 tahun, dan (10) S.M.A.A (?- P.) 3 tahun. Kelima-lima tingkatan dan bentuk sekolah ini, menyesuaikan peajarannya dengan Lembaga Pelajaran Pemerintah dengan tambahan ilmu agama Islam 10 sampai 25 peratus.

Jumlah perguruan al-Waṣaliyah dewasa ini ialah:

Madrasah Tajhīzī	296	buah
Madrasah ‘Ībtidā’ī	301	“
Madrasah Thānawiyah	14	“
al-Qism al- ‘Ālī	3	“
Takhaṣuṣ	1	“
Sekolah Rakyat Rendah	37	“
Sekolah Menengah Pertama	7	“
Sekolah Menengah A.F	2	“
S.G.B	2	“
P.G.A	4	“
Jumlahnya	667	“

Guru-gurunya sekarang berjumlah kira-kira 700 orang terdiri dari guru-guru agama dan umum (lelaki dan perempuan) dan jumlah murid-murid kira-kira 70,000 orang.

Pada tiap-tiap tahun semenjak tahun 1935 sampai dewasa ini diadakan imtihan umum dari seluruh madrasah-madrasah al-Jami‘iyah al-Waṣaliyah menurut tingkatannya. Tahun 1939 telah mengeluarkan pelajar-pelajar Thānawī dan tahun 1943 mengeluarkan pelajar-pelajar al-Qism al-‘Ālī untuk menjadi guru. Tahun ini al-Jam‘iyah al-Waṣaliyah telah mengutus tujuh pelajar al-Waṣaliyah memasuki

berbagai-bagai universiti di Mesir. Dan majlis ini telah mengusahakan berdirinya sebuah Sekolah Tinggi Universiti untuk memudahkan pelajar-pelajar al-Waṣaliyah menyambung pelajaran .

Majlis Dakwah al-Islām

Majlis ini mengatur perjalan penyebaran dakwah al-Islām yang menyampaikan seruan Islam kepada orang-orang yang belum beragama Islam.

Maksud dakwah al-Islām ini ialah penyebaran Islam, mengembangkan kepercayaan keyakiann Islam kepada orang-orang yang belum beragama atau yang berlainan agama supaya mereka menjadi pemeluk Islam.

Majlis Dakwah al-Islām al-Waṣaliyah ini telah melaksanakan usahanya dengan mengutus mubaligh-mubaligh Islam ke tempat-tempat orang yang belum beragama Islam seperti ke Tanah Batak (Pursia, Terutung, Sikalang dan lain-lain) dan mengutus guru-guru Islam ke sana untuk mengajarkan ilmu agama kepada saudar-saudara yang baharu memeluk Islam.

Sekarang di Medan telah dibangunkan sebuah bangunan madrasah. Rumah perguruan dan pendidikan ini teruntuk bagi anak-anak dan pemuda-pemuda putera dan puteri yang akan diutus menjadi mubaligh. Anak-anak dan pemuda-pemuda itu di ambil dari berbagai-bagai kampung di Tanah Batak dan Karo. Sesudah menamatkan pelajarannya akan dikirim kembali untuk melancarkan dakwah Islāmīyah kepada keluarga dan masyarakat di kampungnya. Dengan usaha penyebaran Islam ke sana mereka sudah berpuluh-puluh ribu memeluk agama Islam. Insya-Allah majlis ini akan mengembangkan sayapnya ke Sulawesi dan Kalimantan. (Demikian serba sedikit tentang perkembangan al-Jam’iyah al-Waṣaliyah. Alamt pengurusan di Malaya: Haji Yusuf Ahmad Lubis, P.B. al-Jam’iyah al-Waṣaliyah, 233 Kampung Raja, Sungai Petani, Kedah- P.Q.)